

四庫全書

集部

欽定四庫全書

集部

學言稿卷三

詳校官監察御史臣劉湄

中書臣劉源溥覆勘

總校官原任中允臣王燕緒

校對官中書臣吳甸華

謄錄監生臣陸維新

欽定四庫全書

集部五

學言詩稿

別集類四元

提要

臣等謹案學言詩稿六卷元吳當撰當字伯

尚崇仁人澄之孫也以蔭授萬億四庫照磨
薦為國子助教預修宋遼金三史除翰林修
撰累遷直學士江南兵起拜江西肅政廉放
使左遷撫州路總管旋罷歸後復擢江西行

省參知政事未上官而陳友諒已陷江西遂
遜迹不出友諒遣人召之當以堅卧以死自
誓昇牀載送江州拘留一年終不屈友諒滅
乃免洪武初復迫致之見太祖長揖不拜竟
得放歸隱居吉水之谷坪完節以終所著有
周禮纂言今已佚惟此集存原本九卷明崇
仁知縣新安葉良貴所刊此本六卷則

國朝臨川李紱重刊所併也澄子元代致位通

顯號曰太儒然實宋咸淳鄉貢士出處之間
猶不免責備於賢者當不受僭竊之辟則高
於張憲諸人乃天下已定仍不降禮於萬乘
尤在楊維禎諸人上蓋死生久付之度外其
不為謝枋得者特天幸耳有元遺老當其最
矯矯乎其詩風格遒健忠義之氣凜然如生
亦元季之翹楚顧嗣立元百家詩僅撫甘淶
陽舟中詩三首送樊秀才詩一首附澄草廬

集末其殆未見此本歟乾隆四十三年五月

恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

學言稿卷一

元 吳當 撰

四言詩

明良詩

御史明良賜都稜特穆爾開府為字乃東平文忠王
拜珠丞相之子忠宣王安丞相之孫也

於赫皇祖肇基朔土惟時忠襄實佐神武

天戈攸指罔不率俾忠武之才雄特瑰偉
逮乎忠宣相我世皇式開治平統一萬方
猗與文忠禮樂是式克贊英廟以匡以翼
碩碩元勲後先四王維君之明維臣之良
侃侃開府尚德象賢承厥父祖佛時仔肩
惟皇之念翰墨是錫倅爾嘉名休光有奕
雲漢於昭發耀天藻垂美無疆永以為珎
翼翼厥明終始典學陳善責難世臣攸託

以道事君汝翼汝為股肱左右庶底緝熙
明良之逢有典有則世篤忠貞式報天德

右十一章章四句

恒德齋為開府明良公作

於穆天命恒久不已往禪來續與道為體
惟聖有德率性之常不二不雜悠久無疆
君子是則勉勉不息終始弗渝夙夜無斁
赫赫元勳昔佐皇祖配德惟一永錫膺祚

侃侃聞孫靖共在位式謹爾常以贊天子
佩舄雍雍退食自公肅慎齋居用省厥躬
協于克一責難將美徵其化成萬國咸理
惟巽而動勿承以羞億萬斯年於昭匹休

右八章章四句

極高明亭詩為曾以敬作

春木載榮朝陽孔曦悠悠白雲華蓋之西
爰有新亭翼翼中峙式究爾寧君子攸止

其止維何朝弦莫歌道其問學弗辟弗頗
斯道之著皎焉日星發育峻極斂之靈局
彌綸六合迥絕寥廓周知旁行卓彼先覺
如俯層臺洞視靡遺如持懸鑑固有蔽虧
知崇效天禮卑法地成性之存内外交致
萬物畢脩一貫斯全參乎有唯思也是傳
予忝承學子實名裔自顧無聞祇用生愧
惟博反約實基三省敢曰尚友願以自警

右十章章四句

慶原堂詩為萍鄉劉氏作

惟楚萍鄉邑里有堂繫首劉氏肇基于唐
雄虎之臺鬱鬱丘土其伏未耀本幹深固
子孫多賢冠佩蟬聯積善儲和沂流而源
福慶之實既堅既栗曠曠靈芝毓秀于室
歷宋而元流慶未已袒免同居表德閭里
山冢之遷有霆有雷尚復多祉源源其來

奕奕君子實居後麓既休既寧以踵芳躅
繩繩厥承忠厚之教庶其紹之以食斯報
太史有記邦人足徵式勗來嗣勒詩兩楹

右九章章四句

咸陽王功德詩

在昔皇祖有赫神武維忠宣王傑出西土
佐命而興來受圭組憲宗伐蜀往補戎伍
於穆世皇天戈載揚親拔雲南用遏蠻方

滇之宗臣乃悖紀綱復叛不順襲盜以狂
天子曰嘻孰稱予使爰命忠惠以綏以撫
諭之恩信滌汝煩苦簡節疏目咸得理所
廼疆廼理奠爾城邑市有居貨屋有陶甓
我田我池杭稼黍稷訓厥士女汙俗斯革
既庶既富建學立教籩豆鼓鐘於樂孔廟
詩書歌絃孰則孰儆折其狂獫篤爾忠孝
步不出國侯幽侯深部曲聯繹干戈若林

久而彌孚嚮義駿駿錫貢無已大賂南金
天祚皇國克生偉人歷年孔多以福遠民
遠民之安克順克正惟王之賢天子之聖
元臣云亡遠民孔哀風馬雲車曷往曷來
新廟既作執事有恪王其享茲用配諸葛
錫爵啓封皇則悼之嗣德象賢天實報之
詵詵孫子有引無替太史作詩式昭永世

右十八章章四句

性樂堂詩

繫厥成性浩然其天靈明洞徹溥博淵泉萬物畢脩衆
善具全反身而誠樂莫大焉

惟爾學者夙夜有恪循端致曲實充實擴昭茲本善以
踵先覺觀其會通亦底克樂

翼翼高堂攸介攸寧天光丕容匪間顯冥灼之當為勇
往是程其則不遠勒詩在楹

右三章章八句

集義齋詩為太行高氏作

瞻彼嘉木太行之陰盤盤幽谷侃侃素心
緬焉興懷古道是式惟心之宜至當有則
我其擴之制事不違用達萬變審乎先幾
灼知勇為廼積廼克無間微顯集于厥躬
浩然之生實匪助長天地之塞吾體同量
肅爾齋居永端於初必有事焉昭昭聖謨

右六章章四句

致亭詩

致亭大宗伯充人王公之所構也公字致道又
以致名其亭大夫君子咸取古訓繹其義辭既
悉矣予不得襲言焉故賦以美之且自勗也

瞻彼繹山縣縣其麓爰有君子樂爾貞卜有倬斯亭陰
此嘉木悠悠永歌行行春服

先民有覺昧茲寡聞我其致之匪學曷敦問辨言析反
思其存煥若融徹大明确

顧瞻周行玄邈奚緒曷其致之惟聖有矩我車既堅我馬孔阜無遠弗至式穀爾御

滴彼川流晝夜斯逝邈邈無端原原無已於惟緝熙不雜不二我是用希夙夜敬止

既種既耨廩積孔殷既狩既獵鼎餗具陳秩秩大猷俛焉日新勗爾尚友予亦何人

右五章章八句

脩省齋詩

惟皇降衷弗怙弗虧習遠情肆始淪以隳
有卓君子勵行自修夙夜惕若反躬是求
孰去孰存惟日內省百鑄勿遺靡伺靡騁
脩省之始尤慎在獨勇絕其萌庶制爾欲
於赫斯臨昭昭幽深毋苟自欺其敢弗欽
矧茲明威曷敢戲豫戰兢自持主一無二
燕居觀象恒若存雷益慎益戒萬善具來
審之靡疚式底于完信立願達克承克安

吾儕小人貪欲內錮甘心物欲有寐有寤
為之由已曷自暴棄嗚呼靈臺幸勗爾志

右十章章四句

壽寧堂詩為冀寧耿氏作

於昭秉彝有本有支立愛惟親萬善是基
衍衍令子報德慈母苑茲堂構有翼其宇
魚軒戾止兄弟具在執禮循循百福攸介
旨甘孔時春酒載筵天錫純嘏眉壽永年

金
卷一
哺烏在林遺我好音起處攸寧式慰母心
琴瑟靜好以雅以南式歌且舞朱衣華簪
既曰壽只實在寧只夙夜清溫庶其敬止
敦孝移忠永錫不匱矢詩孔揚以勗來裔

右八章章四句

學言稿卷一

欽定四庫全書

學言稿卷二

元 吳當 撰

五言古詩

四月朔都門別友

昨日送春歸今朝送君去君去幾時來春歸向何處都
門柳千行晴空正飛絮祇恐尊酒空離情渺無據

拂雲堂

脩竹臨綠水高堂散清陰猗猗歲寒操皎皎君子心不
承春陽媚已覺秋露深仰止雲漢上高節慎所任

鳳岡隱居

鳳凰千仞岡中有隱者廬流水繞屋下青山當座隅鄰
曲不在多聊可共耕鋤種菊秋露重斲花春雨餘
松下揮鳴絃涼風滿庭除振衣紅塵表濯纓清水渠虛
名果何益此樂將焉如伊人韋同姓行矣巾吾車

送劉山人遠遊

初夏風日清芳華盡披委蕭蕭野人居綠樹淨如洗繁
陰在庭戶晴雲隔窻紙劉君負絕藝幽討亦戾止平生一
緗屐歷歷幾千里南袖嶺嶠煙東拂扶桑水空齋坐終
日論議頗亹亹言立罔迷真浩瀚况無已羣流會一原衆
轍不殊軌昆侖倚西極黃河走其底嵩華與恒岱鬱鬱土
中峙休氣蓄靈光自惜伯玉址結交燕趙豪躍馬長楊
裏堂堂百年身茲遊更奇偉酌酒澆壯懷奮步從此始
送曾冲衍自甥館歸省

慨我林壑姿高思凌雲煙清秋到城邑兼旬得留連者
舊頗凋謝新知多少年曾君金川彥眉冑本蟬聯華姁
照高閭玉樹來鸞鵠自小涉書史已能綴詩篇相值關
闥間被服華且鮮間亦能我即辭氣自溫妍而翁富文
學傳家有淵源十年不相見使我心悁悁奇骨出名駒風
采固超然爾邑危處士其人執且賢詞高連城價字重
青瑤鐫汝能早入室累歲相周旋吾聞古人學忠信蓋
所先彝倫本日用昭著無幽玄本幹既有立華實自芬

蕃願言勤孝弟餘力及藝文友道貴責善我歌匪虛言
同諸彥泛舟遊

移舟蕩綠水櫂擊來清風山樹接天碧汀花向日紅
璋益良朋羣簪得相從窈窕楊柳外逶迤墟里東微雨
灑芳郊流水度晴虹漁歌日暮起清響紫煙中

九日江樓分韻賦采字

江上秋風多客裏時序改嘉菊空滿目幽香為誰采
江樓對西山物景頗瀟灑山雲寒冉冉汀樹晴藹藹何以

慰今朝濁醪向鄰買野饌在盤食梨栗雜醢醢茲二
三友被服盛蘭茝舉琖送飛鴻翩翩望滄海

賦靈碧石山子

卷石重拱壁致之果何從隱几當翠微娟娟秀芙蓉良
嶽玄霧溫香鑪紫煙重五老不可見令我憶黿峰

送吾安之令渤海縣

奉詔出高闕驅車向長河長河正奔崩大野仍橫戈宵
衣動深憂頻歲秋無禾今君宰渤海敷政當如何上以

暢皇惠下以拯民疴
清宮執道要直氣排
洄波東郊散壺榼
月戶鳴機梭境內雞
犬靜壘頭牛馬多遊
人若雲環寔室皆春
和遄歸贊天緯報最
無蹉跎

汪氏桃谿先業

種桃作春華插柳被
澗阿飛梁度窈窕峭
壁纏煙蘿遊息各有
地簡編足吟哦宜有
遯世者看雲時一過
先廬倚丘墳歲晏傷
如何

送丑時中安陸知府

烝庶日凋敝久貽宵旰憂中原有鬪格陋室仍誅求又
聞大河奔無復桑田收羣情自替替時論空悠悠下詔
選朝士傳聲典方州及茲數年來令牧頗清修皇帝威
信布膏澤亦下流用副民社寄庶答廊廟謀君才已歷
試儒術素所優寒露承冰壺黃鍾播天球楚郢古名邦
廛市接車舟人多尚遊販野有良田疇坐令書牒稀行
見瘡痍瘳香凝祭戟靜雨洽桑麻稠問俗在撫摩敷政
尚懷柔三年屢豐穰五袴成歌謳最書舉勞績歸來奏

宸旒

送李伯微山東廉使賦華不注峯

華峰秀亭亭縹緲風雨會湖光納空翠元氣蓄冥昧雲
來泰山顛日出方丈外孤根奠地軸萬木動天籟危攀
望不極高致君應最使節無滯留都人仰旌旆

送趙大本西臺御史得一字

關陝古雄都四塞若天室聖人物土貢沃壤稱第一皇
威極西郵聲教無遠昵崇臺攬紀綱郡國底寧謐趙君

金閨彥楚楚冰玉質出身翰墨場已執太史筆朝裁惠
文冠夕策長亭駟弭節都門道餽帳集簪輿朔風吹秦
隴嶽色寒崒崒涇渭揚濁清河水相蕩潏皇皇霜簡動
肅肅綉衣出丈夫報國心重在理仁術矧茲聖明時布
衣靡闕失胡為守牧宰往往敗繩律飢渴劇飫饕民隱
詎遑恤豈無循良才衆醜成妬嫉遂令白黑撓懲勸恒
過實周詢待摩撫伺察到微密於焉振風采勿使廢殷
率遄歸報明廷煙柳動春日

西嶼書堂

高堂在西嶼積水宜清秋飛梁接廣衍松竹何脩脩草
色洲渚淨書聲庭戶幽美人水蒼佩公子木蘭舟及茲
且容與樂哉以忘憂

橫州新城

守國設險阨由來固金湯天下已一家四海無封疆邊
夷失摩撫虛邑奔豺狼橫州兩江上妖氛日相望烈烈
四野焚哀哀萬民瘡倪君列半刺為政古循良及茲幸

輯睦庶以安蒼黃兵威尚形勢邦本資隄防版築不辭
勞恩波浩難量神功實天相良覺發地蔵遂令千年間
集此百雉強坐見雲鳥隄居然山水鄉峩峩超樓櫓迨
逋蟠池隍落日笳鼓壯寒風旌旆揚屢區表井里公館
臨康莊藹藹聞士譽熙熙浹時康從茲慎備禦奚用多
聞傷長松在澗底至寶委道傍鸞棲自枳棘鷗路空翔
翔誰持太史書為貢白玉堂

謝靈運小像

達人不偶俗窮乃託遐蹤海上采石華山頭接雲松曠
情凌霄外長笑紫烟重白駒不可繫矯若人中龍世詖
道已微君子固有窮多才竟為累寡立復誰從淒涼貝
錦詩千載仍忡忡

蘭石竹樹圖

光風被叢蘭秀氣何綢繆竹樹露已深蕭蕭苔石幽亦
有紉佩者顧芳在中洲含情欲誰寄湘水何悠悠

淵明圖

窈窕墟里烟崎嶇撫遐蹤松菊在三徑歸來事春農乘
化樂天命千古垂高風

菊泉軒

種菊秋水上的花更妍掇英挹朝露牽蘿媚清漣衡
門幽且閒淪跡托貞堅濁酒有深趣樂我以忘年

送立道

清笳動城闕落葉響空井羈客增遠懷繁霜集寒景依
依塞鴻度杳杳江路永昨夜夢滄洲朝來理烟艇

送無悅上人歸高句驪

折蘆渡海水諸方記遐蹤東窮會稽嶺南登祝融峰赤
城霞綺多香爐紫煙重平生幾緼屐伴此九節筇昨者
來闕下祇園憶相逢燕坐永夜燈翻經清曙鐘一徹了
空寂真際何從容法雲散天華珠光起神龍上人既東
歸正法信有宗亦欲乘桴行同心幸相從

雲林圖

吾邦宅冲輿盤礴元氣會嵯峨臨川山遐眺八極外日

月有耿光萬象破冥昧雲林隔滄洲秀色翼華蓋巖桂
芳未歇青霞宜有待願息軒冕游睠茲歲年改

寄題周煉師雲臺真館

亭亭雲臺山重阜隱深廓神宮闢龍虎秀色今繇邈真
館依青林澗水傍虛閣種竹春霧重刊松晴雪落高敞
自無為幽曠各有託時見白雲閒為雨出城郭豈知有
道者元化在機握相從赤松遊不為慕靈藥愧我煩世
慮睠然仰冥漠考槃能自引隨遇有真樂園綺如可期

共爾戒歸鶴

賦謙齋

為山鬱穹窿廼處厚地中君子有令德遜志息微躬種
菊春雨洽紉蘭秋露濃齋居玩易象素履慎初終

賦淵明歸來圖送致仕者

蒼蒼廬山陽渺渺彭蠡東依依柴桑里矯矯靖節翁聊
為三徑資出宰古縣中折腰未為辱自睠菊與松幡然
賦歸來高眠北窓風素琴既無絃尊酒亦屢空籃輿入

淨社植杖隨春農逍遙有真樂疇能繼其踪君生千載
後出處慎初終解印返故山棲此環堵宮作圖勵薄俗
相與傳無窮

送胡宗悅官長沙

五夜霜露集秋風起城頭出門送行客對酒總離憂紅
樹接郊甸白蘋滿汀洲南望長沙雲湘水寒悠悠

委羽山潘氏隱居

天台幾千仞秀色浮蒼穹下有委羽山迢迢赤城東晴

湍激飛瀑靈鵲巢長松睠彼遺世士誅茅白雲通築室
倚飛霞開軒待清風種菊充餽糧挿槿當垣墉孤高性
所玩夷曠思無窮擊壤節酣歌據石撫絲桐迂俗幸無
累寡欲不期豐誰刊蔣詡逕庶躡羊求蹤予將息塵鞅
賞心冀能同

高氏新構大行書院

崖峩大行東陵麓正延廣池河發芳滋耕鑿樂膏壤之
子慎素履義路思獨往黌宮宅幽貞神宇肅弘敞空翠

在庭戶嘉木日以長薦豆不違矩奠席歛來享童冠列
春服歌絃發清響古學貴得師景行屬高仰車馬遠可
致山水良足賞焉得掛朝衣為爾息塵鞅

琴鶴雙清亭

并序

馬君九霄作亭豫章城居之東北隅以貯琴書其祖
御史大夫覃國公始居于斯及今仕於斯者三世矣
覃國貴而能貧太常易名清獻與宋賢趙公同謚清
獻凡仕所至惟琴鶴相隨九霄遂以琴鶴雙清名亭

云

結亭絕囂塵窈窕北堂東新竹雨滿林老樹雲半空開
軒納歸鶴據石理絲桐昔賢尚高潔以此隨行踪爾祖
聲遐思堅貞副深衷錫謚既有尚素心諒能同水木託
本源芳潤信無窮大雅繼宏響遺書滿庭中工歌贊前
勛述德寧有終何時戒仙馭撫席聆仙風

送桂道士

桂子懷武夷翩翩向東粵褰雲采石華著屐踏海月我

昔留豫章爾祖尤清狂高居太古樓呼酒時飛觴一別
上京國屢獻匡時策桃李漫成蹊秋風改顏色持節擁
貔貅干戈徧南州誓將掃氛祲少紓黃屋憂流雲翳太
清謫宦向江城憶聽西山雨對酒寫離情羨子神仙器
去擊滄浪棹不辭行路難獨鶴思凌厲青山九曲溪每
曲可幽棲日暮棹歌裏劍光起虹霓仰挹浮丘袂頰流
賈生涕真隱倘相逢為述煙霞志

叢桂軒九日書懷

桂樹得秋雨清芬散餘葩嘉節百感集寒菊不見花塵
爵幸未虛鄉山久無家悠悠任天運兀兀展物華仲尼
不復夢夷齊何怨嗟豈無西山薇亦有東陵瓜貞心諒
誰同良友各天涯張騫使絕域能駕尋河槎陶潛願躬
耕早命歸田車我獨傷局促愛茲絕紛譁方期煮白石
對君引流霞

燈夕

千山動殘寒萬里有積雪雲影互往還江光乍明滅居

人燈火寂城堞笳鼓歇憂端感時序取酒消憤結

送李黼脩撰以旱請禱代祀嵩衡淮海

帝命脩羣祀天香播八埏春秋王正月歷數史逾年雲
漢憂時切皇華遣使賢鰲頭金榜客鶴背玉堂仙授節
來三殿傳宣下九天百年周禮樂萬國禹山川冠冕移
班序車書際幅員淮流桐柏導岳影外方連望秩嚴稽
典相誠遠致虔過家娛采服聚德煥奎躔紫氣浮燕薊
青郊接澗瀍雜花蔕茂茂芳草馬翩翩魚佩橫雕玉鮫

綃細織凝暮雲低楚樹春水漲吳舡瀚海飛龍外衡陽
落鴈邊祠官羅鼎俎庭石麗牲栓降禱先明齊登歌間
宿縣合蕭馨黍稷沈璧達淵泉圭幣黃金藉文章琬琰
鐫幽靈瞻盼嚮純嘏錫綿延麻麥千郊雨弦歌萬里煙
底今民物阜無復歲時愆問俗裨皇政封章進御筵大
夫勤奉職汗竹紀長篇

天歷初元京師之變大興軍旅中外皇皇遙聞順
附誅放姦臣朝廷清明海宇寧一皇帝神聖郊天

告廟躬行典禮酌功報力恩澤周溥大宥滌濯仁
施滂沛百官稱慶賓筵秩秩進賢去邪皆繇睿斷
太平之運適符於今草野愚臣謹撫所聞著為歌
詠以稱述盛德愧辭語蕪謏不足備太史之採傳
示久遠云爾共八十韻

社稷初聞變朝廷欲託孤羣情迎代邸至德辟勾吳大
業中興主方輿混一圖威聲通海岱神采動江湖郵傳
三千里舟車百萬夫共知尊帝統猶或竊兵符政體蕭

曹輔權綱耿賈扶天機開武略相國發雄謨未足煩游
刃惟宜破大軼先鋒初出銳全陣已摧枯義正師無敵
城降戒不屠乾坤司化育民物盡昭蘇頌禱千官集朝
宗萬國孚勲庸榮閥閥社土賜茅蕝隱惻綸音切優嘉
寵數殊酬功頒府藏怜死恤妻孥始覺埃壘靜端聞沛
澤敷近圻仍給復內郡悉蠲租宥自深仁施情矜舊染
淨塵征隨剗滌縲紲遽懽呼玉燭調蒼律陽和轉碧蕪
祥開山出甕瑞應火流烏會合寧非數休禎信不誣淳

風還揖讓彝訓協都俞公器巖廊備卿材柱石須合祛
登衮袞覽德下于于裏甲寧論武紬書半用儒步聯青
瑣闥坐列錦氍毹金馬天門邃銅駝御路迂考耆視禘
祫報事享郊雩牢醴周彝鼎漆盛夏璉瑚祀皆稽典禮
誠豈薦潢汙宗社金為室庭碑玉琢趺樂縣通夕展宸
席鄉南鋪舞羽虞韶奏包茅楚匭輸裸將流柜鬯篋寶
座璫瑜拜俯冠裳肅周旋組綬紆嘉生光宇宙純嘏接
方隅使者香奩出祠官驛騎徂兆壇尊嶽瀆列時及幽

鄜治卽陰陽正時應水旱無紛紛脩貢篚容易棄關繻
價重連城壁雄夸照乘珠祥麟郊藪獸神駿渥洼駒航
海期王會通城樂賜酺異材徵楚晉良鍛產錕鋹戶版
三年計農田九穀需經邦平賦斂充府別精粗勢邁唐
中葉功高漢兩都皇猷垂後則祖憲重前模接跡風雲
會迎恩雨露衢春旂標禁衛曉箭通宮壺班序崇鴛鴦
華裾賤貉綸閣中羣玉署殿外執金吾饌啓黃羊園香
浮白獸爐宮腰齊窈窕官甕雜醍醐鮮膾銀絲脆駝峯

翠釜腴芳饌調芍藥珍鼎薦淳母優戲停絲竹殊音備
越胡柳塘朝漱灩花塢夕模糊酬酢頻傾倒綢繆極燕
娛時方登俊乂人自屏姦諛濟濟星辰履茫茫造化樞
詞場尊賈馬藝苑薄楊盧大雅風仍樸羣黎俗不渝栖
巖思矯首報國誓捐軀丕顯傳千載重光耀八區封功
登泰華銘刻到衡巫可謂巍巍矣真能郁郁乎丘園思
孔孟耕釣慕唐虞立德期深造從心矩弗踰承家思紹
述篤學謹須臾史忠欲繩芳躅身惟養碩膚簡編時講受

菽水日懽愉氣鬱豐城劍風留渤海桴夕歌樵澗谷晨
耒稼泥塗不效微生直難從荷蕢逋陳詩堪作頌擬賦
漫操觚衆已趨時進吾猶待價沽攄忠遭盛際諏吉奮
長途

予有京師之役十月三日諸君子祖餞章江門行
舟阻南征軍士未發對景書懷以答厚意

城郭寒空迥舟航晚景移故人從此別對酒忍相離漠
漠孤燈遠依依去棹遲碧天新月夕紅樹亂雲時燈火

漁家市鉦鏡虎士旗近聞炎海變頗覺羽書馳雲鳥初
成陣戈船不失期萬方真混一獨立尚愚癡不殺遵神
武深仁仰聖慈朝廷方有道雨露自無私歷數千年會
冠裳萬國儀元勲雖若蜩道脈僅如絲社稷斯民寄經
綸實爾資春袍金錯鳳朝佩玉橫螭未抗匡時疏寧論
喻蜀辭轉輸何惻惻刀劍漫差差自信無遺算誰知有
我師物情何慘切治道尚磷緇疏懶忘身拙蒼茫望國
思祇慚巖穴陋豈是廟廊姿公等俱稱傑吾徒漫欲為

龍紋塵未拂豹隱霧初披
敍粟心猶淡松筠晚更宜
謨求稷契禮樂講臯夔
祖訓須垂後皇猷慎所
持未能期共達何以報
先施踏雪燕臺上看雲
野水湄致君心慘慘望
遠目矚矚奎壁中台動
摻羅四海遺回春端可
待箴器又何疑穎穎囊
錐脫溫溫璞玉奇盍簪
求舊德傾蓋結新知白
雪終難和青山且自頤
臨分勿洒淚努力各相
規

浦江鄭氏義門

故國衣冠地名家孝義門同居今九葉襲德又諸孫時
薦嚴宗祐晨叅列弟昆周旋俱典則辭氣總清溫里閭
尊儒素閨門戒婦言承顏惟豈弟服禮自朝昏籍甚羣
公譽猗歟薄俗敦鄰飢賙粟布客至餽牢飧置驛遺風
舊傳經古意存夜燈書滿屋秋氣稻連村褒奏歸廷議
桓楹表國恩後人方食報逸翮藹高騫從此公侯復終
期福祉蕃五雲來嶽鳳六月起溟鵬

送丁太初溫州蒙古字學正

國字崇當代人才起妙年風雲千里駿日月九重天翰
苑司掄選中書屬次銓光榮毛義檄奮發祖生鞭學廣
儒宮制書傳弟子員宦情依冷椽官舍擁寒氊筮仕無
踰此如君更穎然永嘉今壯辟多藝風稱賢咨訪兼留
意英髦就接肩舊家疑寂寞遺簡想流傳必使聲華盛
應知學業全高情何特達勝日共周旋薦豆登霜柚充
庖載海鮮洞簫吹月下玉樹立風前已兆魚龍化何嫌
雨露偏羣公爭薦進拭目去翩翩

題丁縣令禱雨記後

丙子歲旱邑宰丁侯躬迎仙臨川山又起龍湫乃得
大雨學士虞公為書蘇公喜雨亭記復序其事以遺
之

方夏時苗盛恒陽歲事愆皇皇良宰念秩秩禱祠虔牲
幣修羣祀旌幢擁列仙幽穿青澗底危陟白雲顛清廟
神來只瑤臺夜肅然月生丹井露霧濕石爐烟貯蠻期
真貺精誠徹邈玄蛟龍盤窟宅圭璧達淵泉甘澍隨車

至靈飈卷旆旋為霖因往日行潦及前川吏治能無愧
農功屢有年弦歌春藹藹民物思綿綿已覺謳吟溢惟
令翰墨傳昔賢曾志喜太史續雄篇

趨京道逢劉簿賦詩贈之

好山青擁縣咫尺野人居佐政紆才傑承流畏簡書仙
鳬飛向日瑞鶴遠隨車家自簪纓盛心猶玉雪如丰姿
瞻豈弟馬跡歷崎嶇光接郎官宿聲傳禁直臚茅茨馴
燕雀山澤老樵漁傾蓋論交晚維舟上國初廣輸河潤

遠沾漑晉波餘對酒春生坐調琴月滿除雲開龍影動
江濶鴈行疏別後能相憶裁書為起予

守凍徐州臘月八日大雪與貳守秦侯及同館生
聯句侯許攜酒共賞違期不至遂拾餘韻以賦殘
雪凡聯句已用者置不取

故國徐城壯崇臺楚騎驍豪華雖寂寂名物尚翹翹
遊士賓王日羣農祭臘朝凍流膠解觥寒木寄鷓鴣
三尺冬堪瑞經旬氣未銷太平還有象景色苦相撩
發耀因

明月疑威借怒飈深藏尋隱曲厚積上嶢峣陰瓦千滕
玉珍甕六合窰中規仍毀壁塗槁尚敷鐐向日潛生魄
迎曛頗沃焦危峰明帶縞疎柳弱垂髻甸壤疑翻鹵堂
皇訝長硝水銀堅出冶灰蜃盛塗軌委壑終含垢流漸
始覺煬時和調玉燭陽律長葭蕭秋思抽梁賦民情慕
角招休徵自有瑞純嘏貴能徵同樂期重賞賡歌視不
佻履穿東郭倩寫賜尚方喬旅館時操翰華裾每駐鑣
飲傾金錯落醉拂錦妖嬈逸思翀霄鶴羈情在韝鵬危

言能有采庶不愧芻蕘

河西李氏孝義旌門

邦人推厚德天語表高門自昔干戈集于今孝友敦振
振生八世螯螯又諸孫世已朱輪貴顏如白玉溫承家
深雨露制行謹朝昏粟麥千夫膳牛羊幾處村聯翩來
汗馬奮激起演鵠家法常如此官資詎足論一經遺教
在百忍古風存棣萼榮春服荆花覆酒尊羽儀鴻有序
兵衛虎連屯盛事垂編簡聲華徹禁閭恩波通弱水和

氣接崑崙薄俗嗟淪靡陳詩示後昆

彭城守春旱禱雨

恒陽徵僭忒雲漠閱時勞大野黃塵動中街白日高窮
黎憂惻惻良牧思忉忉禮秩祠羣望官聯領衆曹雩壇
登祝史俎實載牲牢肝蠶通幽閱精誠絕慢愒王春方
介祉神化豈屯膏靈雨隨車騎陰風卷旆旄麥禾朝媿
媿松檜夜騷騷甘澤經三日渾流失九臯涓涓通隴畝
衮衮向波濤陋巷荒龜詈衡門擁艾蒿雜花紅似錦細

草綠於袍已識天無妄寧論地不毛秋成看粟粟民食
免慙慙帝德迴衷眷輿情解鬱陶巫歌迎賽肉社鼓送
香醪豈弟皇恩暢循良盛世遭書年應紀異作頌更興
褒亦有垂綸客臨流為洒毫

送翟御史僉山北憲

北京開臬府持節肅羣工寵甚郎官幘威仍御史驄承
恩方踏踏辭闕去匆匆紫氣榆關外朱轡瀚海東霜寒
翻驚鳥雲影送冥鴻觀省窮遼水從容問國風宸衷推

惻隱廟議動昭融已覺皇威布常令主澤通邊烽無野
戰物色屢年豐善政應除弊貞心獨秉忠祀朝依碣石
賓日候王宮處處謳歌起家家樂事同勲名宜立致簪
紱會登崇更草匡時疏懇懃達帝聰

六月二十日奉迎皇太子寶章龔左司賦詩遂次
其韻

萬世尊皇極重光啓帝猷草儀周典禮特筆魯春秋鶴
駕高門出龍章別殿收承桃稱主器監國賛成謀旭景

前星煥春宮御氣浮輦前新族仗花外不聞騶甲觀三
千里霓旌五色旂珊珊蒼玉佩穆穆翠雲裘定命迎仙
英禎符錫範疇龍媒初效力鴈序總停輶宿雨猶涵潤
涼風颯似秋九重思繼述四海念懷柔自昔經綸密應
知德業優朝宗脩貢篚畫一接康侯輝赫張天步從容
仰冕旒穆生存醴久疏傳錫金綢問學虛前席登瀛列
舊游國惟隆本幹時已播恩休亦有樗材散寧無匠石
求濡毫雖儼頌健筆愧難儔

上命師相輔導青宮又次前韻

黃閣資賢輔青宮贊聖猷
潛龍淵肅肅儀鳳羽秋秋秘
殿黃金額仙居白玉樓
台階基化運后德順嘉謀
昭代功無敵高名世不浮
衣冠陪後騎貔虎擁前騶
庶事猶懸鑑羣公若綴旒
醉傳鸚鵡醅寒賜鸛鷖裘
宿漕風連海新田雨滿疇
捷書時挿羽使者日乘輶
閑閱經綸地明良際會秋
聖情歸錫賚天語出溫柔
固識王章在深惟相業優
河山留誓券茅土冠君侯
越騎瞻戎服徐邦

識廟旒法從三尺謹恩及萬方稠薄藝嘗簪筆微班得
從游未能酬夙志何以報鴻休鍾鼎非吾願山林亦易
求寸衷徒耿耿期與古人儔

辛巳秋初歸田有期喜而成詠因感今懷昔賦成
一百五十韻

河山神禹績幽冀帝堯都畿甸三千里

今畿古幽
冀并三州

干城

百萬夫天戈隨所指地軸待人扶跡啓龍廷遠兵臨虎

塞孤

國初取燕
雪夜入虎北口

羣雄歸霸主四傑翊基圖炎緒賓賜

谷寒金撫鍛鑪中原方板蕩庶類劃昭蘇九壤邦家賦
三農黍稷租戶封登歲版物貢應時需漕轉河倉腐煙
輸甸竈舖經綸開世室混合盡寰區弼亮求耕釣英賢
起敗屠有橋題墨柱載道棄關繻濟濟皇多士雍雍國
碩儒師行湯誓訓謨協舜都俞一德遵神武多方囿化
樞星辰天北極文物地東隅孺子誰堪託交鄰信已渝
禍機生肘腋剝喪切肌膚內潰離荆楚先聲震越吳築
臺方拜將破竹已長驅談笑收圖籍輪困發歲帑義夫

思感激烈士涕沾濡旌旆滄溟棹衣冠島嶼郭哭秦無
復報蹈海竟何辜曾記忠臣傳空存內秘厨始因三統
正已作萬邦孚重譯而來獻脩程不憚劬建邦強本幹
分社列茅植綬冕朝儀集梯航貢篚輸殿開金幕席地
隱錦氍率土尊元會靈杓直孟取垂旒容穆穆鳴玉
色愉愉瑞擬龜陳範祥開象載瑜鳳旂飛散繪虎帳挿
彤旌晝接初張宴春城大賜酺舞行分羽翾樂奏引笙
竽御酒擎鸚鵡宮腰蹋鷗鵠繡簾香噴霧紅袖臉凝酥

寵錫公無訖皇心愛不姑從容周典禮宏遠漢規模勲
業誠高矣文章亦煥乎堪輿全所畀開闢古來無奕世
歸前烈丕承仰聖謨設科仍較藝獻頌競操觚第列金
張密恩從衛霍殊錫符盟券赤納陞戟門朱優戲時聞
鼓珍庖日薦腴花嬌金屋貯勍熟翠眉須擅制由先徹
承謀又故吾豪胥真首禍接迹合羣諛豺遘多噉嚼蠅
營善聒嚙程書違尺度黷貨較錙銖鼎餽頃筐載宮牆
糞土朽紛紛聯組綬瑣瑣進葭莩編戶渝名籍樞兵窟

隸奴賦輸年削弱魑魅暗擲榆廊廟輕千慮鋤耨起一
呼蟻穿終潰決蠱食莫支吾伏莽狴狴犬鳴祠處處狐
邑荒煙寂歷野戰血模糊國步何顛躓奸謀敢覬覦風
塵朝漠漠笳管夜嗚嗚烽燧飛燕薊冰漸帶易溥樓前
朱汗馬城上白頭烏奚啻生痼癘疇能洗毒痛賜書從
慰藉哀詔漫於戲悵望鴻飛濶追扳驥足驚射天悲賤
血浮海勇乘桴迷復行多青顛頤口卒瘠人才今鹵莽
世道日榛蕪憶昔丘園賁懷賢歲月徂紫微華蓋坐黃

道泰階符喬嶽宗衡岱深源達泗洙作人宜棧樸為政
敏蒲盧國已稱多造時方見大巫共稽夔樂律獨詠魯
風雱石室紬書盛賓筵誦席數百年悲宰木一束真生
芻子敬家趨在元成世業俱六經懸日月百刻謹朝晡
力學為師古專門亦授徒許身期稷禹憂世慕唐虞自
忝龍門客人稱鳳穴雖讓推吳季札忠擬鬬於菟官政
年方盛成均矩不踰於焉思繼紹不敢離須臾粉署青
絲直華堂瑞錦鋪清時叨著作極力事描摹述德安能

及知非竊比蓬蒼茫懷野服容易接亨衢清廟資梁棟
微材愧構榱立螭簪白筆冠豸伏青蒲折檻心常壯牽
裾氣不麤家聲幸未墜朝論轉相掄魚索垂腰重駝章
結綬紆乘輿時警蹕瑣闥曉追趨賜食分羔雉連茵雜
豹羆上林巢鷺鷥太液散鷗鳬春色紅雲島寒光白玉
壺暑清長夏簟露浥冷秋菰宮樹惟栽柳仙家亦種榆
步陪宗伯履筵列侍中襦服禮期無玷論兵實自迂承
恩辭殿陛列騎出閭闔上日羣公錢皇華六轡諏宣威

揚繡節伐叛賜金鈇霜氣橫埤垠湖光應屬鏐由來懷
德地今日不臣誅否泰機潛伏乾坤亂已憚侯王神所
賚僭竊爾何愚優詔從寬大傷心獻馘俘轅門存簡翰
斥候遣戈爰小腆原原附渠魁寸寸剗臨危親決戰鼓
勇擔捐軀分閫多違命爭權始構誣漫遭搖毒萬豈望
報恩珠誰謂青蠅集能令白壁污山昏鶚啄屋江暗鴈
啣蘆暫鍛扶搖翮真成局促駒藩臣墮戎備野老獨驚
吁蔽日來幟幟長風送舳艫閉關方吝賞破的已摧枯

舉目郊原竄傳聲將相逋與誰矜閥閱無復顧妻孥殷
吟憐崩角幽歌美跋胡居然魚漏網拙甚雉羅罟戴笠
山頭杜持旌海上蘇悽悽冰肺腑颯颯雪頭顱夔蜀詩
千首嵩陽飯一盂滿盤朝首宿幾見歲屠蘇義路成孤
往名韁詎可拘民情肩可察羈思口空餬枕石身長病
餐霞體任臞秋原傷蔓草夙志棄桑弧未築揚雄宅猶
乘范蠡湖感時思顧遇望遠意踟躕故里荒松菊良田
秀董茶輿臺夸負乘衿佩困泥塗林黑煙藏豹山

空雨笑黿仰天瞻大介無地哭窮途茅屋尋常夢梅花
八九株敗垣牽薜荔流水揀秔稌野藪從人饌村醪不
用沽春風徐步屨秋影鑑髭鬚麋鹿忘猜隙漁樵結友
予獨招華表鶴親釣錦江鱸溪月明如昨山花色似姝
經丘通窈窕尋窟歷崎嶇真似陶彭澤歸來足自娛

歸舟江漲

壬寅三月

乾坤誰草昧城郭自戎衣白髮頻年病滄江此日歸長
途經戰鬪久雨滯芳菲雲水浮天起風帆逆浪飛尋盟

鷗泛泛尺素鴈依依
汨沒聲名在艱危
故舊稀及春營
野事諏吉到荆扉
紅杏家家酒青山處處薇
節旄寒更落
遯跡氣常肥
不洒前憂泪
惟全杜德機

次韻歸途示友

仙舟楊柳渚遊子芰荷衣
劍引龍光動櫓隨
燕語歸鶯花春冉冉煙草暮
菲菲北極樞常運南風檄
屢飛曹瞞空有挾劉表
竟誰依高臥風流遠
諸生候問稀
久無滄海夢自掩白雲扉
遺事曾編竹幽情獨采薇
乘時生

蠹孽遂欲飫膏肥泉石無辜願風塵早息機

吳原廟龍津亭

豫章城西四十里吳原山有風雨二池其深莫測四
時不竭盖有龍居之邦人作廟祀焉張九齡開元中
為邦督以旱禱祠輒應作詩紀其事貞元中兵部侍
郎權德輿為撰祠記皆見郡志國初祠廢郡人京棧
傳從畊復祠祠前作亭四楹名曰龍津今祠燬而亭
存傳之孫以誠為黃冠師比遊西山見亭扁廼大父

所書攷其歲月八十五年矣予賦詩識其感慨云

龍德為天用神功發地靈風行千里雨氣合兩池星昴
蟠通幽閔昭融接混冥朝廷崇祀典郡國載圖經闔闢
乾坤大高深海嶽寧祈禳端有自黍稷肅惟馨古廟丹
青畫威顏土木形紅塵生瀕洞碧瓦見飄零野甸寒蕪
白高原老樹青江山餘勝概黨術有津亭望遠雲三島
凭虛屋四楹衣冠存古制翰墨表儀形珠浦光仍復綃
人織未停遠孫來拜俯遺事繫瞻聽志已期增飾誰能

與勒銘南陽吾獨臥西嶺亦高局不作南巖夢難招楚
澤醒題詩寄寨廓感慨在郊垌

再和康武一百五十韻

茲承雅製鋪張匡山之景憐予飄泊而見招深見高
誼然吾家華蓋臨川二山間二山江南之名山也至
元中先子常辟地臨川山陰布水谷著書凡五載然
後歸後之人以其地為觀距吾隱居四十里每憚其
峻絕僅即其麓而止而華蓋之近則數造焉自為吏

不獲造亦二十餘年矣今聞匡山之勝雖它景故樂也況予舊隱而先子之舊遊者耶因韻成章用述吾思且識吾愧謹寄呈左右以答厚意以成後約云

臨川真隱處華蓋古仙都拔地幾千仞當關惟一夫堪輿方鎮立開闢鬼神扶秀色金蓮並姓天玉笋孤龜疇標分野鼇極奠輿圖蛻跡仍留洞遺丹尚在爐壽星南斗迥氛瘴北風蘇澗草俱靈藥畬田亦國租土宜兼沮洳物貢備供需石乳晨堪采霞漿夕待鋪昔時存廟殿

大谷有廛區福祉民依德齊民市絕屠多方真合統九
達不傳繡世業因成俗山居半是儒代祠天使下賜號
帝音俞六宗分壇兆三辰運道樞休嘉垂祐祚純嘏決
邊隅大化能無詖羣情孰敢渝空花光奪眼寒粟凍生
膚建禮師從蜀逃名卒在吳詩傳山鬼詠酒喫澤龍驅玄
壁加神幣香奩發御帟菲菲空翠撲灑灑露華濡架壑
虛撐屋懸崖儼梵郭四方牲制醢百物禮稱辜圓燂
昇朝氣天燈映夜厨便蕃真貺集容易惠心孚襁襁邦

家謹躋攀守收劬登歌絲間竹縮酌館承植象物委蛇
致精誠懇款輸周旋瞻彤蠻拜俯藉氎旣震雷驚巖隙
瞰陽眺海陬洋洋羣望秩穆穆萬靈愉雲幹銅池秀瑤
花雪色瑜高居朝絳節大燾擁弓旅雅頌農迎臘春秋
黨醪醕萍甘分楚實松響效齊竿陰谷藏損雌陽坡叫
鷓鴣遠嵐濃似黛小雨潤如酥羽札傳青鳥鸞書降紫
姑界高歸育發陶冶出鈞模神化茫茫爾文章郁郁乎
坤維終古在國事近來無不有氓為崇烏知廟失謨妖

塵徒瀕洞秋色自稜觚和順英華暢生成品彙殊葉重
光點漆果熟艷施朱春盡薇尤脆秋來蕨更腴衣冠驚
傲擾物色靜相須專壑深連幹趨朝一遠吾官聯陪俊
傑史筆削姦諛陳誼惟忠蹇摘詞豈囁嚅太阿初失柄
闕石竟迷銖所限千尋抹空憐一簣圻烽煙歷江海玉
樹倚葭莩舊業餘兵燹新詩示瘵奴昭融生掩抑固兩
肆擲揄逸志終難降高飛不易呼含情問桑梓忍淚盼
楸梧廢邑號豺虎荒墟穴鼠狐歸心寒怵慄望眼老糢

糊此此爭淪沒蚩蚩竊覲戰場猶鬪格暴氣獨喑鳴
盆子空懷沛王郎不渡潯久傳河上騎應逐幕中烏
潦倒憐身病艱危念主痛風雲增契濶綸綍息於戲已覺
歸遲暮何由策蹇駕塵侵蓬島樹浪蹴海津桴問俗情
懷惡營巢手足劬間閭忘揖讓松菊盡荒蕪帝業元無
外先朝事已徂萬邦歸顯烈一德閔陰符道統承周旦
儒聲謁魯洙詞華高漢魏翰墨劣王盧大雅蕪商頌悲
歌出楚巫祝傳多福告祠報有年雩乂廸重華協祇承

四海敷大賓朝玉帛厚往及新葛間出生人傑由來盛
際俱降神資屏翰立德繼申甫不識真王佐猶知大聖
徒經存遺禮樂書正古唐虞戶屨來朋樂家瓊付衆離
宅中思卜洛丘首欲營菟臺齒能無倦從心自不踰業
弘天廣大熙緝道須臾帝制頻繁掌皇文特達鋪應期
俱述作好古豈臨摹命世人推孟時言使託蘊悠悠懷
道跡坦坦履高衢清廟朱絃瑟明堂藻繪櫨窮年遺寢
榻終日坐團蒲大匠宜規矩羣材合細麓縉紳漸薦達

懸鑑發褒揄楚楚長裾曳鋤鋤弱組紆經筵重席講家
禮過庭趨旭序班鷄鷺星垣列虎軀共瞻儀世鳳暫出
上方鳬巧藥分珍饌伊蒲送玉厨好賢旋授粢調鼎或
宜菰車馬陰陰柳星辰歷歷榆成均警羽籥公子錦衣
襦鼓鐸明彝教章逢化腐迂一朝違觀闕孤棹別城闕
幾見宣麻召頻來駟馬諏遊山時着屐刊徑曉持鉢裘
障揚旌旆平岡按屬鏤亭臺迎客賞榛蕨命童誅氣合
天無際秋明勢更虛孤高來爽豁阻塞肖昏愚培埴還

依麓牽連若獻岵周迴青屏翳羅立碧戈爰幾度凌嶢
嶮誰能與剗剗敝廬千載契高臥百年軀候氣常聞異
嘉禎詎可誣白虹開楚璞明月并隋珠早已高時望鄉
無舊染污出門平陟嶢臨水密編蘆差穀雖離鴈場苗
皎皎駒遺榮恒淡薄勇退衆驚吁采服從韶齔青帆共
舳艫鶴歸華表遠龍去石池枯今似秦人贅長憐楚客
逋無家懷里巷有恨哭妻孥杯土阨山怪歸魂依舶胡
區區近骨肉稍稍脫罽罽遺恨賢王李甘心屬國蘇扶

蒸勞脛胷覽鏡愧頭顱春麥黃雲杵秋秔白雪盂比鄉
仍枳棘何處又屠蘇夙契留深眷羈懷耿自拘草冠心
寡累蒸糝口堪餬勝地蒙招隱高情欲養臞衰年常伏
枕新月屢張弧名阜同千里扁舟異五湖望雲情繾綣
觸暑足躊躇霜脆深泥芋飴甘沃壤茶誠能結茅屋不
復夢軒塗水國寒生燐烟村夜聽鼃兩山元共姓一致
豈殊途桃是玄都種橙宜錦里株瓜紅秋熟速甕白歲
收徐久已安時棄何須待賈沽御冬存短褐傳信賴長

鬚快覲期追琢嘉言別易于尋盟言鷗鷺餘事託蓴鱸
發興成酬唱忘形效醜姝天遠瞻宵窅賢路慨崎嶇但
遂煙霞志青山任所娛

康宗武和庶介

昨承惠教長律雍容爾雅雖衰世之志而有治世之
音三復歌歎第以韻拘難和謹效唐人用韻而不能
次拙亦甚矣耑錄奉呈伏乞垂教幸甚

鰲極分羣類鴻靈奠八區人文疏地秘吾道幹天樞義

畫龍圖行蒼書鳥跡紆力田初識耒伐叛肇轡弧穆穆
隆皇治雍雍闡帝符比封侯稷契執藝總斯及熙洽均
黎庶光華薄海隅百王宗令德一視效宏撫河洛滔滔
水邦畿坦坦途征苗開誓命載亳僊來蘇垂統將干祺
偕行慨獨夫鳴岐爭觀鳳流屋喜瞻烏文德重華並聲
名二代踰耄荒尋遇滿板蕩適遭胡地啓耄王裔天開
素主徒象尼神已降銘鼎口先餽禮樂昭雲漢春秋凜
鉞鉞遲回思狗鐸浩蕩欲浮桴窈窕詩書固巍巍道德

陬莫楹雙涕淚錫誅一於戲魯道淪衰薄秦坑肆毒痛
叔孫儀鹵莽伏氏語含糊六藝多狼籍羣言竟囁嚅隋
儒輕擬議晉帖巧臨摹湘水迷荃芷梧臺雜瑾瑜書林
秋浙瀝義圃晚荒蕪京洛乾坤闢周程劒佩俱道存康
節邵學衍紫陽朱地望崇鄒魯淵源接泗洙耕莘伊尹
聘出畫孟軻迂寂寞遺經笥淒涼大冶爐輝輝山蘊玉
藹藹澤藏珠一統真元會羣生德澤濡梯航千里貢玉
帛萬邦趨繡繪衣裳被章程典冊敷席重丹宸座土列

白茅蘓盛德躋平世頻年賜大酺倦扶筇竹杖寒擁罽
賓氈

歲晏

空江歲年晏暮色水霜劇鴻飛何冥冥幾月度砂磧孤
臣欲灑血萬里書一尺君王穀琫弓幸向上林射

學言稿卷二

欽定四庫全書

學言稿卷三

元 吳當 撰

七言古詩

明皇教笛歌

綠楊煙裊春晝長
沉香亭北萬花香
君王製得清平曲
教與花前吹鳳凰
玉靨生霞春夢起
閒愁不上蛾眉裏
欲使嬌聲發絳唇
為調新譜傳纖指
絕世曾聞玉樹歌

調成新曲更情多人間吹作無窮怨白日深宮奈樂何
曲中更奏霓裳舞誰信漁陽有鼙鼓驪山宮樹起秋風
腸斷香消馬嵬土

贈太虛子長歌

昔遇太虛子飄飄在灤京東風吹雪添河水宮樹五月
無流鶯君隨掛席窮彭蠡子亦函香窺海水誰料宮袍
又縛身却騎黃鶴上星辰我我瀛洲客盡是謫仙人從
此相逢金闕下詩酒清狂轉瀟灑揚雄閉戶草玄經白

髮秋來漫盈把
矯首望太清
妙運無時停
宵爾元化樞
歷歷日與星
游塵雜氣起
尋丈容光擾
擾紛成象
所以太古仙
倒景霄漢上
知君深居勘
大還呼吸沆
瀣怡芳顏
朝衣早掛松
蘿間坐邀王
子晉吹笙紫
雲間令人可
望不可攀

達彥脩秘監號雲松隱者又自作圖邀予賦之

香鑪雲氣半空赤
千尺長松倚青碧
謫仙去矣秀色留
誰與孤雲共棲息
蓬萊高人業嗜古
身在道山天咫尺

為君先約彭澤翁五老峰前候飛鳥

題燕人雪溪圖

朔風驚沙大地裂水腹凍堅飛積雪誰識山陰放棹時
疎竹寒梅映清冽鑑湖一曲綠生衣蕭蕭白髮苦思歸
憐君歲晏如相訪江上漁蓑在釣磯

送吳景尹游嵩岱無寄尚元素劉道源

尹也我同姓論交每忘年閉戶讀詩書所最在古先男
兒生時蓬矢六壯歲何為守窮谷昨者張帆向順風千

里長淮春水綠我聞君行不忍別楊柳新條未堪折君
今別我歸何時思君惟對芙蓉月芙蓉山月四時圓擘
崖飛瀑寫哀弦君登嵩岱望海日我正獨坐對月聽潺
湲太室山人尚處士昔年宦學來南楚劉郎好古也自
賢為訪于今讀書所緣雲更有最高峰雲間倘遇米芝
翁殷勤幸道余心中江南春風花正紅有酒滿醖澆君
胸酒醖有盡別意無終窮

美趙侯祈禱

徐關古郡雄東國河上孤城高岌岌長波激浪兩流合
遠黛凝煙衆峰立當時豪傑雖已矣功利至今存霸習
自從聖代百年來稍有弦歌事沿襲趙侯作牧駕朝駟
紫綬銀章光熠熠塵上彤管書牒稀春滿青郊民俗輯
今年恒陰若為沴滿耳秋聲風雨急驚雷怒電白日飛
擁樹連村黑雲濕曠野悲號麋鹿羣寒潭翻動蛟龍蟄
波濤滾滾迷岡阜禾黍離離失原隰天高地厚斗不聞
老農祇抱鋤犁泣我侯輸誠籲彼蒼奠幣陳牲勞汲汲

乾端坤倪豁呈露霧散煙收倏呼吸麗日昭回晝景舒
祥飈蕩拂滛威翕于今報祀禮無違長願豐穰民乃粒
萬井桑麻接境多四方冠蓋如雲集侯家自是國楨幹
在肯聲華藹都邑矢詩為載爾農謠卷阿更續生民什

詩莊

雅大中采四方名士詩數萬篇名其居曰詩莊

詩人自昔身多窮云是身窮詩乃工太白飄零一杯酒
杜陵茅屋隨秋風君莊采葢不盈掬僅有新詩千萬幅

飢來一字不堪煮猶是逢人索珠玉年少執戟稱衛郎
軟裘快馬雙明璫驅馳王事出奉詔西拂弱水東扶桑
龍光南去衝牛斗含香曾到扶胥口雲邊曉掛洞庭風
花時夜醉長沙酒人間曾見墨淋漓當時采筆生光輝
千金散盡不自惜囊中惟喜有新詩嗟予豈是能吟者
秋月春花渾漫寫故園菊松已荒蕪兩鬢蕭蕭雪盈把
君不見相如作賦家四壁子雲草玄宅一區君莊風月固
有餘不知身世貧何如

段應奉湖山舊隱

臨平湖邊秋閣小古木幽篁通窅窕雲間迢照落漁帆
江上餘霞送飛鳥蒹葭蒼蒼月滿磯何日西風一棹歸
詩成沽酒切鱸膾坐見山水涵清輝

南徐守李士寧勸農之日朝廷遣使召為大興府
尹郡人為圖其事求予賦詩以記

晴川遲日明花柳酒帘樂器村村有承平官府勸農來
竹馬齊迎賢太守自從太守到南徐春衣有帛食有魚

男耕女織不用勸連岡斷壠皆新畝今年又見祠田祖
牢醴香肥雜歌舞烏犍受策自扶犁東風霎霎吹靈雨
柔桑枝上轉黃鸝樹下父老相支攜官曹抱甕貯濃酒
移饌芳亭隨所宜老農得飲增歡喜起聽訓言書滿紙
朝廷無以我公歸坐使風移民俗媿我公歸去民何從
作圖賴與奏天聰常遣太守如我公我民至老歌年豐

潘子華畫上京花鳥

灤陽三月雪正飛隴樹四月青紅稀白翎啄沙黃草薄

阿藍短翅寒相依南薰吹水振羣蟄滿川花草濃雲濕
穹廬露冷牛馬肥蒺藜沙上西風急潘侯妙筆留神都
金蓮紫菊誰家無江南鶯花春冉冉誰寫當年蛺蝶圖

栖鵲圖

江空月冷霜如水雙鵲梢頭飛不起錢侯寫生苦逼真
淡墨蕭疎妙難似君不見上林高樹拂雲齊託巢生子
總相宜願爾朝朝來報喜春風長在萬年枝

野航亭為陳晉賦

山人築居青澗傍數間矮屋如舟航清風飀飀白石爛
滿目野水凝秋光浴水鳬鷺閒來去憑欄總是滄洲趣
竹間涼月白紛紛更似蘆花最深處高情閱世猶虛舟
久矣委心從去留秋風不待歸張翰夜雪每疑來子猷
兒童忽報前川漲雲霧軒窓九天上故園夢斷酒初醒
落日遙聞采蓮唱西安城邊芳草多亂汀橫渚盡煙波
紉蘭為佩寄遠道又恐閒門無客過迢遞江南望江北
佳久豈知身是客多情我自愛桐鄉自信鷗盟寒不得

亦有扁舟彭蠡賓別却槎頭今幾春
明朝便合投簪笏
向子亭邊與卜鄰

徐州贈同邸客

臨川山人來作客萬里攜書上京國
朔風吹起黃河水
河上行舟帶寒色窮冬雪花三尺深
客憲抱膝惟長吟
夜聞解鞍有同邸晨即市酒開囊金
舉杯殷勤相為語
家在單州閭巷裏庭闈有親七十餘
闔家穉耄數百指
上堂稱壽春熙熙下堂服勞日濟濟
門戶有子鷹晨昏

盤飧任婦承甘旨東風吹綠牛羊肥良田自足供鋤犁
夾溪桃李炫晴晝映堦萱草迎春輝共知吾邦是樂土
男勤耕桑女織組貿遷有貨居廛市歲時無事煩官府
家人老大不出門長兒近日遊荆楚阿嬭愛孫如至瑤
畫室悲驚為愁苦予情觸興更皇皇遠出求之來侍旁
賢愚不足掛懷抱夙夕忍此慈心傷我聞斯言亦感激
秉彝至德各有常爾能慈孝出天性篤行自足為義方
責善恐違賢聖訓至誠可貫金石剛琴瑟在御良燕喜

塤箎迭奏成鴈行庭前綵服列三世人生至樂樂未央
酒酣為子歌慷慨持贈可比黃金璫嗟予霜露興慘愴
蓼莪三復劬勞章

湖西羅受可作梅月圖贈予北行賦此報之


青山湖上去白雲湖上住草屋八九間梅花兩三樹年
年許客看花開花下攜琴載酒來對花把酒喚鶴舞酒
酣落月尚啣盃孟黃昏疎影橫斜好更取生絹拈筆掃高
情能畫勝能吟風雪荒寒憶郊島我來不值花開時騎

馬獨從湖外歸上陽密露春如海祇有東家蝴蝶飛

九江丁祀聞鼓吹感懷

上丁脩祀又春分鼓吹聲傳旅夜魂世路荆榛迷聖域
沱江煙草怨王孫空憐宇內干戈滿無復河間禮樂存
上國風雲清廟閔中天日月素王尊春秋攝獻元臣重
爵秩追崇祝號敦束帛承筐先俎豆牢牲升鼎從羔豚
公侯顯相千金幣犧象宗彝九醞樽玉磬編鐘歌大呂
朱弦疏越奏雲門諸生襟佩趨鴈序百辟冠裳謹駿奔

翠積宮庭寒肅肅光生花樹曉煇煇秦坑灰燼遺經墜
王業陵遲古道昏霄翮倚風留退鷁轍鱗隨水化冥鷗
八音變律何由正六典周官詎易論自嘆白頭思紹述
謾垂青簡照乾坤



學言稿卷三

欽定四庫全書

集部

學言稿卷

四至
六

詳校官監察御史_臣劉湄

中書_臣劉源溥覆勘

總校官原任中允_臣王燕緒

校對官中書_臣吳甸華

謄錄監生_臣陸維新

欽定四庫全書

學言稿卷四

五言律詩

江上晚景圖

遠景峰巒色高松鍊石柯晚晴初放棹春水已生波盡
畫滄洲趣難傳欵乃歌山居無戶牖端為白雲多

紫霞庵

元 吳當 撰

結茅江水上霞氣護幽居已似赤城迥常疑丹井虛仙
桃承雨種秋葉帶霜書應得長生秘晨餐願乞餘

贈梁道者

江東梁道者自少學神仙袖有燒丹術囊無買酒錢看
雲眠白日對月禮青天為問蓬萊水何時似昔年

山居圖

茅屋在林陰桃花夾徑深遠山渾似黛遊客總能吟杳
杳穿雲杖蕭蕭坐石琴展圖懷舊隱便欲解朝簪

六月舟次房村

紅日荒荒落黃河滾滾流客行當盛夏水宿似清秋市
遠人煙少村平樹色稠遙山青數點明日過徐州

極高明亭

憑虛連白水望遠俯青山結屋煙塵表吟詩松竹間落
花緣客掃飛鳥共雲還肯着蒲團坐從君盡日間

仙遊觀紫雲亭

山色更深處燒丹仍築亭春雲瞻紫氣夜月卷黃庭種

竹堪扶老栽松已伏苓何時解塵鞅來寫換驚經

九日紫極宮對酒

野水通江濶山雲挾雨涼燕辭宮署遠鴈過海天長紗
帽花堪挿仙瓢酒更香蒼茫懷國夢烽火尚炎荒

酒罷分韻得桑字

江海舟初動山林興詎忘已荒陶令菊未種武侯桑對
酒雲千里懷家鴈幾行今朝小兒女箇箇紫萸囊

九日夜酌分得枝字

對酒盃頻舉看雲席幾移軒楹秋宵宵燈火夜遲遲醉
脫烏紗帽香傳白露枝忽思三徑裏花蕊正離披

次韻答蕭性淵巡檢

官舍連脩竹春旗映遠山宦情江海外劍氣斗牛間田
野無巡邏漁樵有往還萬方逢盛治弓馬更清閒

和劉季平

昔聞灘上水遠自粵南山喬木三春裏清音五桂間片
雲留客住細雨棹舟還為恐離家久芳庭草色閒

和蕭獨清

昔別是何日長聞隱道山題詩傳海內賣藥出人間
林鶴隨雲出潭蛟帶雨還偶來高坐處簾外落花閒

清明日同學士李惟中趙子期及國學官攜酒東
嶽宮後園看杏花

柳色滿河堤春沙不作泥家家踏青去處處聽鶯啼翠幄
凌風迴香車簇道齊揚雄甘寂寞載酒問幽棲

祠廟出東城風雲拱百靈神光通御闕天影抱彤庭隙

地多幽事芳辰聚德星道人偏愛客更許製茅亭

宮館憑孤曠幽林眼底生藥畦晨露重茶竈午風輕酒
許麻姑送羹從海客烹鄉心勞想像便欲棹舟行

新火營寒食他鄉展物華暖雲將燕子春色上桃花自
進賢人酒何勞妓女車平居耽野趣未覺道林賒

圃因春雨種竹自昔年移雲影常依石春泉已滿池望
中情未極花外立多時每動田園興東風長鬢絲

上林華蓋逼官署紫垣開疏閣經時序淹留惜酒盃仙

人栽杏去學士看花來幾日應開遍題詩許重陪

仙人遊圖

鶯啼通宵窈馬跡歷歷顏載酒溪橋外哦詩松樹間桃花深映竹雲影淺依山無限臨流興扶藜欲叩關

送人歸蜀

愁寂都門別艱危蜀道行四山皆雨氣當日有鵲聲北極紅雲闕西江白帝城懷親兼戀祿去住總關情

送人下第南歸

落卷人爭讀扁舟客自歸
苑花秋冉冉江雨夢霏霏
壯志經留筇傷心線在衣
看君負文彩他日倍光輝

童氏作樓奉親名曰樂心

高構日登臨庭闈總稱心
遊魚出水底鳴鶴在林陰
山雨晴留黛松風夜當琴
地幽多勝事不惜酒頻斟

史指揮作堂學傍名泮鄰

旌榮將軍第今聯孔子堂
泮泉通射圃庭草映宮牆
義訓三遷舊家聲五桂香
城南天咫尺駐屐許相將

送蜀士赴潮陽巡檢

江深巴子國海濶粵王城萬里獨為客三年嘗領兵艱
危才易見留滯氣難平莫洒臨歧淚圖南羽翮成

王孝子刲股

孝子有異行世情生嘆嗟爐香通夜白股血啓晨禱兒
體應無恙親年幸有涯殷勤鄩人對直道正奇褒

贈沛縣陰陽教官

七政陰陽紀三辰卜祝科中原井邑小聖世教官多譙

鼓夜傳漏野田春湧波儒冠自拘束莫聽大風歌

節婦挽詩

抱節青春苦滎陽有故家教兒能綰綬報德已宣麻臺
倚已清墓風傳魯婦髮夕陽原上樹依舊宿慈鴉

題唐子華畫

老樹吳江上茅茨八九椽晚山濃似黛秋水淨無煙盤
石堪垂釣孤舟許醉眠卜居宜近此何日賦歸田

送毛李祥歸雲林因託之訪予山居

客子年方盛家山花正濃扁舟遡鴻鴈高浪蹴魚龍京
國五千里雲林六七峰升堂舉春酒始得豁心胸

莽莽聞征鼓紛紛踏去船衰顏尚簪紱雅志自林泉茅
屋應無恙山田幸有年憑君上華蓋為訪白雲邊

送李卓歸臨川

江上兵雖滿山東路已通髮從今日白花似去年紅浮
世嗟蓬轉幽棲想桂叢因君萬里意極目送飛鴻

徐氏同德堂

千載南州士流風氣誼存合居今五世同德又諸昆白
日書連屋清秋稻滿村聖朝敦孝禮桓表已旌門

送楊曼卿

京國鶯花裏扁舟望舊山煙蕪連楚澤春水隔鄉關訪
古題詩遍匡時草疏閒丈夫無別淚此日滿愁顏

福泉亭

築室廬江上山泉亦有名深源流福澤長日作春聲潤
偕桑麻秀寒分井谷清塵纓如可濯來看白雲生

挽待制楊賢可

才選古循吏名成初制科百年存氣節五郡起謳歌致
政冰銜重題詩秀句多風流今已矣洒涕望江沱

宵旰憂民牧人才轉寂寥如公多令望絕跡上清朝玉
署真成夢金魚漫在腰慶源宜有待嗣子各風標

送倪長卿

江漢風塵裏關河日月傍乍疑音問濶頓覺羽書忙獻
賦垂歸索銷魂逐去檣朝纓漫羈束何計濯滄浪

送宣使蔣槃歸寄江西省郎中顏希古

故國雄藩在清秋使者歸江湖陟險地舟楫蹈危機士
壯常思鬪城高屢受圍亦嘗修諫草直欲把天衣

行李隨秋色蕭蕭出帝城兩行憂國淚萬里望鄉情賦
斂無修貢瘡痍未息兵大廷俱鼎食何以報昇平

方鎮諸軍缺城池累月攻戰場宵燐碧賊壘曉旗紅幕
府謀猷密羣公膽氣雄妖氛須淨掃崖石始銘功

吾廬華蓋下喬木白雲邊每憶秋風鱸常懷雪夜船傳

烽今四野飛檄已三年亦有平安問煩君萬里傳

送徐仁遼陽教官

遼水東臨海榆關北際燕官程千里外行色五雲邊
童冠來春服歌鐘雜夏弦莫嗟無籍在歸路近星躔

送人補閩憲譯

能事通重譯宮資早致身江關流譽在憲府薦書頻
鵬鷲思雲路鶯花怨暮春甌閩邊檄淨冉冉離風塵

送王都事度海入京

萬里皇華使千夫瀚海船長風披朔霧高浪蹴吳天江
漢新烽燧車書舊幅員不勝遺老淚咸望太平年

便宜曾奉詔受節大明宮列郡旌旗合三關道路通
師親督戰破賊不論功率土王臣在何人高誼同

許國心猶壯馳書路更長物情移白黑士氣轉蒼黃郡
邑風煙裏衣冠日月傍共誰清海嶽持以報君王

當宁資賢輔持危輦聖圖萬邦通禹貢九德協臯謨師
出宜無敵城降戒不屠老臣空有策何計徹神都

望柴桑

何處柴桑里當年處士家五株門外柳九日逕邊花已
草歸田賦難乘下澤車故山塵漠漠極目送昏鴉

詠懷舊隱十五首

舊宅今何在雲山昔更清樵歌秋樹谷漁網夕陽汀門
巷來車蓋書聲接戶庭遺墟悲蔓草浪跡信浮萍
江霧仍為雨山花故作容秋風餘鼠雀寒水落魚龍慄
慨心猶壯羈棲力已慵白雲華蓋表悵望最高峯

憶昔升堂日諸生授簡時
遺經周禮樂野服漢威儀
一自趨丹鳳微班侍玉螭
風塵驚歲濶猿鶴怨歸遲

高堂存古制粹德儼先容
道脈千年統人心百世宗
夜臺悲化鶴雲氣想猶籠
松柏寧無恙青山一萬重

西齋風月好庭草到堦前
春服趨童冠秋聲雜誦絃
題詩黃葉上挂竹白雲邊
俛仰成今古銷魂為黯然

喬木依深谷居人尚幾家
衣冠迷宿草舟楫失桃花
轉聞寧無已勞生已有涯
毋煩問松菊何計事桑麻

契濶風雲會，栖遲道路長。
老來猶作客，春至好還鄉。
酒醒天連屋，詩成草滿塘。
家聲尚清白，世態任炎涼。

黨里烏巾集，鄰翁古意淳。
瓶甕隨野俗，耕稼及清辰。
世業諸孫在，寒山白屋貧。
為傳宗譜舊，長使旅情親。

幽居臨水竹，老桂出林阿。
蔭接青雲武，花開碧玉柯。
百年秋露重，十里夜香多。
榮悴知何意，炎塵起海波。

故園誰識主，曝背已忘君。
霧雨雞豚社，寒山鹿豕羣。
池分澗底水，園斲壠頭雲。
茅屋知堪賦，長歌對夕曛。

昔人營寺日野老在朝時棟宇山林淨松杉土壤宜海
塵留法雨檀施寄禪枝接地多先壠春秋擬合祠

茅屋雲猶在桃源世已非漁樵能有待鴻燕尚知歸霜
露春秋感風塵造化機松楸千里日夜夜夢魂飛

世事嗟何及天倫恨已深乾坤一杯土霜露百年心去
住青山隔艱危白髮侵丈夫無別淚此際倍沾襟

山黑天仍雪江寒梅未花昔年賓國日幾醉上林霞勇
退尋歸棹甘心理釣槎如何青布襪未得踏溪沙

白社千頭橘成都八百桑每思親棣萼不為問山莊太
史瞻鳬影家人識鴈行茅茨容易葺春水棹相將

匡廬

匡廬望不極幾度涉風濤秀色一道出振衣千仞高仙
巖誰種玉鬼谷舊栽桃白鶴巢雲表秋宵見羽毛

雙劍峰

雙劍倚秋漢孤城瞻碧岑嶽連吳楚濶光合斗牛深勝
地千巖壑長江一帶襟州圖增殺氣愁眼倦登臨

述感十五首

聖祖開寰宇英賢集網羅暫煩周斧鉞即聽舜謳歌世
閱風雲濶耕巖雨露頗萬方俱職貢一旦盡烟波

輿圖歸覆載天畀萬方全帝德元無外皇綱自失權中
原墮土賦內郡落民編國計東南隘經邦愧昔賢

太祖收中夏餽儲賦土田河倉紅粟腐漕壤紫臺烟民
物滋殷阜車書轉瘠捐可憐疆理在運會付茫然

南國昔歸順中原仍戍藩歲分貔虎士陣入烏雲屯名

籍淪逋竄樞兵失討論諸君甘負國故里亦空村

帝患湮洪水人思鑿鉅河萬方勞畚耜列郡困徵科處
處黃巾社紛紛赤子戈千年遺恨在銘石寫嗟峨

泉貨資桑幣經綸稱物宜低昂三尺法斂散百年規拙
甚黃金注淒其白鹿皮紛更愆祖憲廢閣失天威

夜直麒麟殿晨司虎豹關周廬諸子貴枕戟衛郎閒通
籍存奴隸連車載匪頒世勛何補報戎馬淚潛潛

世爵推勲閥元戎典禁兵營分龍虎衛勢接鳳凰城烽

火迷千里煙塵犯兩京
臨危忘勇決何以答昇平

黃頭稱國士碧眼佩天弧
突騎今何在風光古所無
舊看裝寶劍可怕執金吾
畜銳思防患憑誰衛兩都

命將圖推爵登壇愧匪材
舟車空府庫金帛散興臺
論賞屯膏澤爭權稔禍胎
舊家零落盡廟算實堪哀

四野悲龍戰羣方習豹韜
煙塵來滾滾江漢去滔滔
雲構千章棟風帆萬斛艘
炎波俱鼎沸何用賦民勞

福極頻移柄明良久失圖
匠材違矩度博局轉泉盧
寶

鼎宗周器玄圭大禹謨萬方俱有間九貢近來無
乳牴隨散節帛鴈識纍臣漸覺關河壯應瞻日月新威
聲通海岱喜氣入梁秦萬騎輕天塹何時一問津

異鄉風景切人事見推移冠蓋非前日豪華又幾時年
深鷓鴣草春老杜鵑枝依舊青山色寒雲滿目悲

世自餘蛇豕人猶慕鳳麟節旄寒在牧鉞鉞暗生塵有
夢能歸國無隣可避秦幾年江海上老淚獨沾巾

高臥

冰霜寒序集燈火夜堂深高臥塵侵榻長吟雪滿簪空
存三寸舌不負百年心慷慨能忘死饑寒亦易禁

初度日

衰疾年添算劬勞思轉傷聲華江上霧勲業鬢邊霜詩
繼唐風作書從禹穴藏光陰何冉冉華蓋鬱蒼蒼

大雪

蕭蕭驚朔雪浩浩怒天風虎穴先朝事鵝池半夜功中
原思將帥亂世識英雄今古興亡蹟乾坤闔闢中

相疑

向國應無計歸田屢作期江湖身病日松柏歲寒時老
鶴雲千里驚烏月一枝人生各有志物態莫相疑

雪

積雪疑冬瑞羣情兆歲登洞門淪徑隧宮瓦失觚稜煙
火江村獵寒漸野水冒殊方兼久病高臥竟何能

雪霽

江上千峰雪天邊幾縷霞凍漸依岸梗冰柱落簷花野

迴山光薄沙明樹影斜負暄貂已敝抱病蝨空爬

臘月朔

羈客無頌朔窮年有此朝山明仍戴雪水落不通潮黃
道環辰極青陽轉斗杓仰關身萬里轉壑夢連宵

世路

世路難如此京華事若何風雲歸草昧日月傍干戈南
土分爭久西秦王氣多累臣獨洒淚衰疾臥江沱

同駕

白日行天速青山去國遙昔年蒼水佩同駕紫雲輶漢
節猶堪牧虞旌不待招人生誇氣概莫遣旅魂銷

臘日

鄉心違伏臘宦跡歷關河酥酪分隣粥絃匏擁醉歌天
清雲路濶春近雪花多事業今如此江邊一釣蓑

戲題

牧地連雲水羔羊飽杞椒體充香透骨尾重雪凝膘珍
出天厨饌爐傳禁臠燒先嘗時有賜况復酒頻澆

西域葡萄熟漿醪不用酤色深灤水菊香重塞城酥甘
露浮銀甕寒冰貯玉壺相如猶病渴傳賜近來無

閔姜公碩

竊據窺神器人心事事非每聞優詔下無復報音歸虎
穴寧容飾龍韜未息機小臣徒減血不得沃天衣

館人

風雪夜迢迢探囊失故貂燭龍滄海濶帛鴈上林遙伏
枕調詩律篝燈注酒瓢館人情思厚尚覺旅魂銷

旅館

旅館經時序，羈愁轉寂寥。
山空寒隱霧，風急夜鳴條。
塞雪應無際，軍聲自不驕。
何時衰老淚，拭目聖明朝。

春近

頗覺邊塵淨，仍看畫刻添。
江風寒透屋，野日暖窺簷。
病減尋書快，春來憶酒帘。
歸心何日遂，談笑聽閭閻。

積雪

積雪山河淨，昏霾宇宙迷。
鴈聲來漠北，兵氣自征西。
海

霧浮龍影關寒慙馬蹄時危增憤結衰病屬羈栖

廬嶽

廬嶽不可極山深宜養恬松巢隣李白菊徑似陶潛秀
色雲千仞秋光雨一簾漁樵與麋鹿於我更無嫌

陽九

厄會符陽九沉疴閱歲三蘇卿吟漠北庾信賦江南山
影開晴黛湖光接暮嵐艱危心不展俯仰事何慚

春日得鄉信

旅思春江上鄉山宿霧中鬢毛難再黑花蕊轉添紅病
減詩囊在愁多酒醖空衣冠俱散走何地哭途窮

釋悶

世亂復為客衰顏對物華江城年節酒野樹歲寒花雪
嶺明殘照煙汀帶落霞為誰添白髮何計問丹砂

兵交

虎狼猶構禍四海苦兵交鼓動霜飛劒殆鳴月拂朔川
紅依壁壘林黑避槽巢野老仍羈旅何鄉可結茅

戒守

戒守時鳴鑿傳更夜擊刁亂山青拂眼衰柳綠垂髻畧
陣樓船壯先鋒越騎驍軍中稱漢將誰是霍嫖姚

十有一月至子正月連雪不已

氣合冰天址光連雪嶺西愁來望不極詩罷思俱迷漸
凍江淮遠昏霾嶺嶠齊飢寒春事迫何以慰蒸黎

虛索

世已聲華改身兼老病侵幾年滄海夢一旦白頭吟旅

館驚虛索寒城急暮砧固窮知義命何用較升沉

病中移居

江水東流去廬山北向來孤城新第宅浮世舊風埃久
病頻移榻多情數舉杯鄉心猶未已春色苦相催

擾擾人間世蕭蕭物外身江山如有態草樹暗生春自
笑新巢燕誰憐舊主貧旅懷相慰藉真率見情親

卜築

水外十三坡居人總荷戈煙營江樹盡霜木隴雲多樵

爨村村屋斧斤旦旦柯白駒空谷在何事卜行窩

戰士

戰士屯邊壘家人問繇久寒堂悲蟋蟀月戶怨蠨蛸巷
有招魂帛林無返哺巢干戈何日洗倒載虎皮包

烽煙

烽煙寒轉急喪亂歲難休野老無家別遺畦盡力求關
河多騎氣江海自漁舟世事由天運何須涕泗流

舟中

何鄉能遯跡天地有漁翁沽酒時曾醉探囊歲屢空衰
年雙鬢白長日一絲風談笑兵戈外興亡俛仰中

九日辛丑

兩度黃花酒尊空思轉傷去年留病榻今日復虛檣
飯依人屢踈衣透骨涼干戈天意在去住更何鄉

羣情

社稷生奇變關河入戰圖樓前朱汗馬城上白頭烏
國步分光嶽江流接蜀吳羣情思伯業佳氣矚皇都

所思

興圖真混一廊廟之才賢得失輕千慮奸雄起九廛陰
霾迷歲月戰地起風煙洒涕江湖外漁舟白日眠

天意

僭竊千家郭顛連一病夫虎狼相啖噬齒爪及斃孤凍
餒民何賴分爭霸易圖物情知厭亂天意啓禎符

遠客

遠客又遭患其如頭白何繫舟沙岸久閉戶水寒多喜

氣聞關塞軍聲接漢沱廢興知運數海內厭兵戈

鈔掠

鈔掠民何賴孤窮痛不禁江山慘寒色鴻鴈有哀音
白髮三年病青霄萬里心路迷塵冉冉腸斷暮駸駸

孤舟

牛斗纏兵氣江湖隱使星客頭元自白天眼為誰青
夕照留漁屋寒蕪接雁汀孤舟風水濶百計問柴扃

悲歌

世亂人多暴魂驚客屢過采薇春事遠席枯夜寒多涼
月侵蘿薜清霜看芰荷荒墟唯痛哭野老亦悲歌

子月午日壬子夜半雷雨

客愁隨日度寒律向東排黎庶干戈暴蒼天號令乖江
雷宵送雨山霧曉生霾安得氛埃淨春光接泰堦

學言稿卷四